



Ličnost nedjelje Perica Stanić, precizan i jasan

Nezavisni odbor primio je k znanju informaciju **SIPA** te pružio punu podršku u radu rukovodstvu ove agencije

Piše: **EDIN BARIMAC**

Još jednom je rukovodstvo **Državne agencije za istrage i zaštitu (SIPA)** sa **Pericom Stanićem** na čelu naglasilo da kategorično odbija apsolutno sve navode o navodnom nezakonitom postupanju, odnosno nezakonitom prisluškivanju v.d. glavnog tužioca Tužilaštva BiH Gordane Tadić. Navode, koji su krajem avgusta i početkom septembra bili top-tema, **SIPA** je odbila na posljednjoj sjednici Nezavisnog odbora Parlamentarne skupštine BiH, a kojoj je zajedno sa Stanićem prisustvovao i njegov zamjenik Đuro Knežević.

Zahtijevali su i da se što hitnije o ovom pitanju provede istraga i izvrše sve neophodne mjere i radnje, te provede bilo kakav nadzor kako bi se utvrdilo da ništa nezakonito nisu učinili.

Čelni ljudi **SIPA** dodali su da smatraju da se ishitreno izašlo u javnost i da su odmah nakon što su dobili prvu informaciju o ovim dešavanjima, izdali pisanu naredbu za unutarnju inspekciju koja je za 24 sata provela istragu i utvrdila da su službenici u odsjeku koji je nadležan za ove mjere i radnje zakonito postupali. O tome je i Tužilaštvo BiH obavijestilo javnost.

Ipak, dan kasnije od očitovanja Tužilaštva BiH na sjednici VSTV-a potpredsjednica Ružica Jukić je navela tokom svog izlaganja "da je izgubila i povjerenje u direktora **SIPA**".

- Bio je ovdje svjedok koji je rekao da sve što sam ja poslala direktoru **Perici Staniću**, on je poslao Mektiću, dodala je Jukić, ne otkrivajući identitet svjedoka i ističući da je nakon toga od novinara Josipa Šimića dobila dopis u kome se tvrdi da se ona prisluškuje.

- Nesporno je da smo Gordana Tadić i ja prisluškivane i da smo praćene, poručila je tada Jukić, tako demantujući navode Tužiteljstva BiH izrečene dan ranije.

Podsjetimo, Šimić je uhapšen po nalogu ovog sarajevskog Tužilaštva i tereti se za krivotvorenje **SIPA** dokumenata, odnosno dokaza o navodnom prisluškivanju Tadić i Jukić.

Iz **SIPA** su se i tada oglasili saopćenjem u kojem su naveli da Tadić i Jukić nikada nisu bile predmet rada **SIPA**, niti su prema njima poduzimane posebne istražne radnje.

No, Nezavisni odbor primio je k znanju informaciju **SIPA** te pružio punu podršku u radu rukovodstvu ove agencije. Također dobio je uvjeravanja da ova nemila situacija u kojoj su se spominjali odnosi između **SIPA** i Tužilaštva BiH nije ostavila traga i da oni nastoje da rješavaju sva pitanja i vode istrage po naredbama Tužilaštva BiH.

Perica Stanić na poziciju direktora **SIPA** došao je s funkcije savjetnika direktora Policijske Republike Srpske, a iza sebe je imao više od 20 godina rada u policijskim strukturama.



Perica Stanić: Kategorično odbijeni navodi o prisluškivanju Gordane Tadić